



# Muzikološko društvo Federacije Bosne i Hercegovine

MUSICOLOGICAL SOCIETY OF FEDERATION  
OF BOSNIA AND HERZEGOVINA

**Sarajevo, 22.10.2024.**

## **U Sarajevu počinje 14. Međunarodni simpozij “Muzika u društvu”**

Muzikološko društvo FBiH i Univerzitet u Sarajevu – Muzička akademija sa zadovoljstvom najavljuju 14. izdanje Međunarodnog simpozija “Muzika u društvu”, koji će se održati od 24. do 26. oktobra 2024. godine u Gazi Husrev-begovoj biblioteci, dok će neke od popratnih programskih aktivnosti biti upriličene i u Galeriji Bosanskog kulturnog centra Kantona Sarajevo, te Zemaljskom muzeju Bosne i Hercegovine.

Međunarodni simpozij “Muzika u društvu” najznačajniji je bosanskohercegovački i jedan od vodećih regionalnih naučnih skupova ove vrste, koji se bijenalno održava od 1998. godine. Načelna tema Simpozija “muzika u društvu”, označava njegovo usmjerenje ka višedimenzionalnom, diversificiranom i transdisciplinarnom diskursu savremene nauke o muzici, kako u bosanskohercegovačkim, tako i u internacionalnim okvirima.

Stoga će ova trodnevna konferencija ponovo biti tačka susreta vodećih stručnjaka iz oblasti muzikologije, etnomuzikologije, muzičke teorije, muzičke pedagogije i srodnih naučnih i umjetničkih disciplina iz 12 zemalja. Program će uključiti 13 radnih sjednica, tri predavanja, promociju knjige, radionicu, panel diskusiju, dva koncerta i izložbu.

Svečano otvaranje Simpozija bit će upriličeno u četvrtak, 24. oktobra, u 17:00 u Gazi Husrev-begovoj biblioteci. Tim povodom će u 17:30 etnomuzikologinja i profesorica na Muzičkoj akademiji Univerziteta u Sarajevu acc. prof. dr. Jasmina Talam održati plenarno predavanje pod nazivom *Etnomuzikologija u vrijeme rata: pogled iz Bosne i Hercegovine*, a zatim će u 18:30 uslijediti koncert ansambla Etnoakademik koji će izvesti reprezentativne primjere starije i mlađe, vokalne i vokalno-instrumentalne, svjetovne i duhovne te gradske i seoske muzičke baštine Bosne i Hercegovine.

U petak, 25. oktobra, osim radnih sjednica, program u Gazi Husrev-begovoj biblioteci će uključiti i panel *Muzika za djecu i mlade u Bosni i Hercegovini (1945–1991)*, a zatim i promociju knjige *Život i djelo Elly Bašić* autorice Denis Vasilj u 14:30, te u 17:00 plenarno predavanje Leona Stefanije, profesora muzikologije na Fakultetu za umjetnost u Ljubljani, na temu *Muzički arhetipovi: Međutonovi muzičkog istraživanja u internetskom dobu*, dok će u Galeriji Bosanskog kulturnog centra KS u 19:00 biti priređen koncert *Ususret 70 godina Muzičke akademije Univerziteta u Sarajevu (izbor iz opusa profesora kompozicije)*.

Završnog simpozijuskog dana, 26. oktobra, u Zemaljskom muzeju BiH od 15:00 do 17:00 će biti priređena vođena posjeta izložbi *Počimalja* multimedijalne umjetnice Lale Raščić.

14. Međunarodni simpozij “Muzika u društvu” održava se u saradnji sa Gazi Husrev-begovom bibliotekom, Bosanskim kulturnim centrom KS, Zemaljskim muzejom BiH, a uz podršku Ministarstva za nauku, visoko obrazovanje i mlade Kantona Sarajevo, Ministarstva kulture i sporta Kantona Sarajevo, Federalnog ministarstva nauke i obrazovanja, Fondacije za muzičke, scenske i likovne umjetnosti, Fondacije za izdavaštvo i AMUS – Asocijacije kompozitora – muzičkih stvaralaca.

Više informacije o 14. Međunarodnom simpoziju “Muzika u društvu” i programska knjižica mogu se pronaći na web stranicama Muzikološkog društva FBiH i Muzičkoj akademiji Univerziteta u Sarajevu.

Kontakt  
Aida Adžović  
062 204 906